

Ուղերձ ՀՀ Նախագահ՝ ՍԵՐՃ ՍԱՐԳՍՅԱՆԻՆ

Մեծարգո Նախագահ

Ճարտարապետության բնագավառում պետական մրցանակների շնորհման գաղափարն ինքնին պետք է վկայեր, որ մեր երկրում կարևորվում են ազգային մշակույթի զարգացման, ճարտարապետական արժեհամակարգի զորացման, պահպանման ու հանրահռչակման խնդիրները: Սակայն երբ մի ձեռքով խթանվում է նորը, մյուսով՝ արտոնվում նախորդ նվաճումների կործանումը, ապա իմաստագրվելում է ոչ միայն բնագավառում պետական մրցանակներ շնորհելու գաղափարը, այլև ընդհանրապես մեզանում ճարտարապետության ոլորտի կրթական համակարգի առկայությունը, քանզի անհնար է կրթել ազգային ոգով տոգորված սերունդ, եթե նա հետադարձ հայացքի իր հորիզոնում նախնայաց արարումներ այլևս չունի:

Ուղղորդվելով այս մտայնությամբ, մենք՝ ՀՀ Նախագահին առընթեր հայրենական ճարտարապետության ու քաղաքաշինության բնագավառում Հայաստանի Հանրապետության պետական մրցանակի շնորհման հանձնախմբի անդամներս,

խորապես մտահոգվելով վերջին տասնամյակում հանրապետության ողջ տարածքով մեկ ճարտարապետության ազգային ժառանգության հանդեպ սեփականատերերի նախաձեռնմամբ սկիզբ առած բարբարոս վերաբերմունքից,

փաստելով խնդրո առիթներով հանրությունում օր օրի հնչեցվող տազնապի ու պահանջի հանդեպ պետական կառույցների թնաթափ կեցվածքն ու անտարբեր պահվածքը, ինչի հետևանքով անդառնալիորեն չքացան պետական պահպանման ցուցակներում ներառված բազմաթիվ շենքեր ու շինություններ, որոնց ճակատագրին այժմ արժանանում է “Զվարթնոց” օդանավակայանի հոյակերտ համալիրը,

վկայելով, որ այս ամենով կոպտորեն խախտվում են նաև միջպետական մեր պարտավորությունները, որոնք ամրագրված են ճարտարապետական ժառանգության պաշտպանության Եվրոպական համաձայնագրում և վավերացված ՀՀ Կառավարության կողմից,


գիտակցելով, որ մենք, առաջին հերթին՝ ճարտարապետներս, կամա թե ակամա դառնում ենք արատավոր այս գործընթացի մեղսակիցն ու մասնակիցը և հիշեցնելով, որ նման ուղերձով դիմել ենք Ձեզ դեռ 2013-ի մայիսի 20-ին, այժմ որպես բողոքի նշան, հանդեպ համատարած մշակութային ջարդի

հայտարարում ենք ՀՀ ճարտարապետության և քաղաքաշինության ոլորտում պետական մրցանակների շնորհման ենթահանձնաժողովում մեր անդամակցության դադարեցումը և կոչ անում սառեցնել այդ ենթահանձնաժողովի գործունեությունն այնքան ժամանակով, քանի դեռ չեն խստացվել ու չեն կիրարկվել Հայաստանի ողջ տիրույթում պատմության և մշակույթի անշարժ հուշարձանների պահպանումն ու հանրահռչակումը երաշխավորող օրենսդրական ակտերի անվերապահ կիրառումը:

Այս առնչությամբ, որպես առաջին և անհետաձգելի քայլ, հորդորում ենք անհապաղ դադարեցնել Հայաստանի պետական մրցանակի արժանացած ու միջազգայնորեն իբրև 20-րդ դարի երկրորդ կեսի հետխորհրդային տիրույթում իրականացված ճարտարապետական լավագույն կառույցը ճանաչված „Զվարթնոց,, օդանավակայանի անհիմն ապամոնտաժումը՝ մինչ նրա վերագործարկման նախագծի քննարկումն ու հաստատումը:


Հարգանքով և հուսով՝

Մաշուր Քալաշյան




ՀՀ վաստակավոր ճարտարապետ
ՀՀ պետական մրցանակի դափնեկիր

Մկրտիչ Մինասյան




ՀՀ վաստակավոր ճարտարապետ,
ՀՃՄ նախագահ

Ասլան Մխիթարյան




ՀՀ վաստակավոր ճարտարապետ,

Սարգիս Սարգարյան




ՀՀ վաստակավոր ճարտարապետ,
ՀՀ պետական մրցանակի դափնեկիր

Լևոն Խրիստաֆորյան




ՀՀ վաստակավոր ճարտարապետ,
ՀՀ պետական մրցանակի դափնեկիր

Աշոտ Ալեքսանյան




ՀՀ վաստակավոր ճարտարապետ,

Նունե Զիլինգարյան




Ճարտարապետության թեկնածու
Լիոնի բարձրագույն ազգային
ճարտարապետական դպրոցի
պրոֆեսոր

Անուշ Տեր-Մինասյան



Ճարտարապետության թեկնածու
ԵԱՊՃՇՀ դոցենտ

Աշոտ Արշակյան



Ճարտարապետ, ՀՃՄ անդամ

15 հուլիսի 2016 թ.,